

2

SI JESUS ANG IPINANGAKONG MESIAS



Sa Araling Ito'y Pag-aaralan Mo

Katangian ng Hula ng Biblia
Kahalagahan ng mga hula
Pagkatupad ng hula tungkol sa Mesias
Seremonya ng panghuhula

Mga Hula tungkol sa Mesias
Tao at Diyos
Handog at ang Tagapagligtas
Propeta, Saserdote, at Hari

Katangian ng Hula ng Biblia

Ang mga hula sa Biblia ay mga mensahe ng Diyos sa kanyang bayan sa pamamagitan ng kanyang mga sugo, ang mga propeta. Sa pamamagitan nila, ipinabatid ng Diyos ang nais niyang gawin ng mga tao at ipinakita sa kanila ang maraming mga bagay na magaganap sa hinaharap.




Kinasihan ng Diyos ang mga propeta upang isulat ang mga bagay na ipinahayag Niya sa kanila. Ang mga ito'y nasa Biblia ngayon. Ang mga hula nila ng mga pangyayaring magaganap sa hinaharap, ay nagtatangi sa Biblia sa ibang banal na mga sulat ng ibang mga relihiyon. Marami na sa mga hulang ito ang nangyari ayon sa pinakamaliit na detalye nito. Ang Biblia ay naglalaman din ng mga makasaysayang pagkatupad ng maraming bilang nito. Ang ilan sa mga hula ay nangyayari na ngayon. Ang iba'y malapit nang maganap.

Kahalagahan ng mga hula

Ipinaaaalam sa atin ng natupad na mga hula sa Biblia na ito nga'y salita ng Diyos. Sino pa kaya ang makaaaalam ng tiyak ng bawa't detalye sa hinaharap na mangyayari at makapag-lalarawan ng mga magaganap sa isang bayan sa tiyak na lugar at tiyak na panahon pagkalipas pa ng daan-daang taon. Pinatunayan ng


Diyos ang pagkasi niya sa Biblia sa pagsasabi ng kanyang layon at pagkatulad ng lahat ng bagay gaya ng sinabi niya sa pamamagitan ng mga propeta.



Ang mga hula sa Matandang Tipan tungkol sa darating na Tagapagligtas ay lubhang mahalaga sa atin sa tatlong mga kadahilanan:

1. Masusukat natin ang buhay ni Jesus ayon sa mga hulang ito at makikita kung Siya nga ang ipinangakong Tagapagligtas.
2. Higit nating mauunawaan, sa pamamagitan ng mga hula, kung sino si Jesus at bakit Siya naparito. Ipinakikita sa atin ang Kanyang gawain sa nakaraan, kasalukuyan, at hinaharap.

3. Malalaman natin na ginagawa ng Diyos ang Kanyang ipinangako. Kung paanong nangyari ang mga unang inihula tungkol kay Jesus, matutupad din ang mga hula ukol sa hinaharap.



HINAHARAP

Ang Gagawin Mo

Piliin ang tamang sagot.

1. Ang mga hula sa Biblia tungkol sa mangyayari ay

- a) kapahayagang tinanggap ng mga propeta mula sa mga espiritu ng patay.
- b) kabatirang nakukuha sa pag-aaral ng tinatahak ng mga bituin.
- ... k) kapahayagang ibinigay ng Diyos sa pamamagitan ng kanyang mga propeta.

2. *Isipin mo:* Sa anong paraan nagiging mahalaga sa iyo ang pag-aaral ng mga hula sa Matandang Tipan at ang pagkatupad nito? Bakit?

Pagkatupad ng hula tungkol sa Mesias

Tinatawag nating hula tungkol sa Mesias ang mga hula tungkol sa Tagapagligtas. Ito'y galing sa salitang Hebreo na *Mesias* na ang ibig sabihin ay *Pinahiran ng langis*. Ang mga saserdote, propeta, at hari ay pinahiran ng langis, upang ipakitang sila'y pinili ng Diyos at itinangi para maglingkod sa kanya.



Ang darating na Mesias ay papahiran ng langis ng Espiritu Santo ng Diyos upang gawin ang Kanyang gawain. Siya'y magiging Propeta. Saserdote, at Hari. Sa salitang Griyego ang Mesias ay katumbas ng Cristo. Kapag pinag-uusapan natin ang tungkol kay Jesu-Cristo, tinatawag nating Mesias si Jesus, ang Pinahiran ng Langis, ang katuparan ng mga hula tungkol sa Mesias.

Ang mga pangakong pagpapadala sa Mesias ay unti-unting ibinigay ng Diyos sa kanyang bayan sa loob ng 4,000 taon. Inilarawan ng ilan sa kanila ang gagawin ni Jesus sa lupa bilang ating Tagapagligtas. Tumukoy naman ang iba ng Kanyang paghaharing walang kata-pusan. Ilan sa mga hulang ito'y mga pahayag tungkol sa karaniwang kalagayan nguni't lumampas sa pangyayaring iyon upang tumukoy sa pagdating ng Mesias.

Naghayag pa nang karagdagang tala tungkol sa Mesias ang Diyos sa pagdaraan ng panahon — kung saan siya isisilang, paano mamamatay, ano ang Kanyang gagawin. Katunayan, ang ilan sa mga nag-aaral ng Biblia ang nakabilang ng 330 detalye tungkol sa Mesias sa Matandang Tipan. Ibig ng Diyos na makilala ng lahat ang Mesias pag Siya'y dumating.



Ang Gagawin Mo

3. Ano ang ibig sabihin ng *Jesu-Cristo*?

- a) Si Jesus, Mananakop at Hari.
- b) Si Jesus, Hari at Tagapagligtas.
- k) Si Jesus, ang Pinahiran ng Langis, ang Mesias.

4. Pinahiran ng Langis ang mga lalaki upang maglingkod sa Diyos para sa anong 3 katungkulan?

.....

5. Paano ibinigay ng Diyos ang mga hula tungkol sa Mesias?

- a) Unti-unti sa pamamagitan ng mga propeta sa loob ng 4,000 taon.
- b) Biglaan, may 4,000 taon bago sumilang si Jesus.
- k) Unti-unti sa loob ng 400 taon bago ipinanganak si Jesus.


6. Ilang detalye tungkol sa Mesias ang nabilang batay sa mga hula sa Matandang Tipan?

- a) 3
- b) 33
- k) 330

7. *Isipin mo*: Gaano kahalaga sa iyo ang mga hula tungkol sa Mesias?

Seremonya ng panghuhula

Ang mga seremonya sa pagsamba na ginamit ng bayan noong panahon ng Matandang Tipan ay may kinalaman sa hula. Itinatag ng Diyos ang paraan ng paghahandog bilang larawan ng darating na Mesias na magaalay ng kanyang buhay upang iligtas ang mga tao sa kanilang mga kasalanan. Ang gawain ng mga saserdote ay larawan ng gawain ni Jesus bilang sakdal na saserdote para sa sangkatauhan.



Ang buong aklat ng Hebreo sa Bagong Tipan ay nagsasaad kung paano kaangkop ni Jesus ang hulang ibinigay sa pamamagitan ng rituwal na may sinasagisag ng Matandang Tipan.

Sa buong daigdig ngayon, makikita natin ang mga bakas ng mga seremonya ng hula at mga paghahandog na ipinagawa ng Diyos nang magkasala ang tao. Ang maraming relihiyon sa kanilang pagsamba ay gumaganap ng mga palatandaang ito na si Jesus ang tunay na tinutukoy. Ang mga kaanib ng mga relihiyong ito ay dapat na pag-aralan ang Bibliang Cristiano upang matuklasan ang tunay na kahalugan ng kanilang seremonya.

Ang Gagawin Mo

8. Ang mga seremonya ng paghahandog at pagka-saserdote sa Matandang Tipan ay

.... a) mahalagang gawain natin ngayon.

.... b) mahalaga bilang larawan ng hula tungkol sa Mesias at sa Kanyang gawain.

.... k) hindi mahalaga sa atin ngayon.

9. Aling aklat sa Bagong Tipan ang nagpapakita kung paano tinutupad ni Jesus ang mga seremonya ng Matandang Tipan?

Mga Hula Tungkol sa Mesias

Tao at Diyos

Makikita natin sa unang aklat ng Biblia ang unang pangako kaugnay ng Mesias. Tinutukoy Siya ng Diyos bilang binhi ng babae. Siya'y isisilang ng isang babae. Si Adan at Eva, ang unang lalaki at babae ay nagkasala. Sila'y pinapaniwala ni Satanas, ang kaway ng Diyos, kaya sinuway nila ang Panginoon. Ito ang naglayo sa kanila sa Diyos at napailalim sila sa kapangyarihan ni Satanas. Nguni't nangako ang Diyos na isisilang ang Tagapagligtas na lalaban at wawasak sa kapangyarihan ni Satanas. Sinabi ng Diyos kay Satanas:

Genesis 3:15. At papag-aalitin ko ikaw at ang babae, at ang iyong binhi at ang kanyang binhi; ito ang dudurog ng iyong ulo, at ikaw ang dudurog ng kanyang sakong.

Sa sumunod na mga siglo, sinabi ng Diyos sa kanyang bayan ang karagdagan pang ulat tungkol sa Tagapagligtas. Siya'y isisilang sa Bethlehem, sa lupain ng Palestina. Gayunman, hindi siya magiging karaniwang tao lamang. Siya'y walang hanggan. Siya'y walang simula't katapusan. Nguni't isisilang siya bilang isang sanggol at magiging pinuno sa Israel. Ang hula ni Mikas:

Mikas 5:2. Nguni't ikaw, Bethlehem Efrata, na maliit upang lumagay sa libu-libo ng Juda, mula sa iyo ay lalabas sa akin ang isa na magpupuno sa Israel; na ang pinagbuhatan ay mula nang una, mula nang walang hanggan.




Mga 700 taon bago sumilang si Jesus, ipina-kita ng Diyos kay propeta Isaias na ang darating na Tagapagligtas ay totoong tao at totoong Diyos. Isisilang siya ng isang dalaga, walang amang tao. Ang Diyos ang kanyang Ama. Isa sa itatawag sa kanya'y Emmanuel na ang ibig sabihin ay "*sumasaatin ang Diyos.*"

Isaias 7:14. Kaya't ang Panginoon nga ay magbibigay sa iyo ng tanda; narito, isang dalaga ay maglilihi, at manganganak ng isang lalaki, at tatawagin ang kanyang pangalan na Emmanuel.

Isaias 9:6. Sapagka't sa atin ay ipinanganak ang isang bata, sa atin ay ibinigay ang isang anak na lalaki; at ang pamamahala ay maaatang sa kanyang balikat; at ang kanyang pangalan ay tatawaging kamanghamanga, Tagapayo, Makapangyarihang Diyos, Walang-hanggang Ama. Pangulo ng Kapayapaan.

Sa mga ebanghelyo nina Mateo at Lucas, mababasa mo kung paano sumilang sa Bethlehem si Jesus na walang amang tao — anak ni Birheng Maria at Anak ng Diyos. Tao't Diyos, siya ang Emmanuel — sumasaatin ang Diyos.



Ang Gagawin Mo

10. Ibigay ang kinaroroonan sa Biblia ng mga hulang ito tungkol sa Mesias. May mga talatang inulit ng maraming beses sa talang ito.

- a) Binhi ng isang babae.
- b) Makapangyarihang Diyos
- k) Ipinanganak sa Bethlehem . . .
- d) Emmanuel
- e) Pangulo ng Kapayapaan
- g) Isinilang ng isang dalaga


11. Kapwa itinuturo ng Matanda at ng Bagong Tipan na ang Mesias ay

- a) Karaniwang tao.
- b) Diyos ngunit hindi tao.
- k) Tao't Diyos

Handog at Tagapagligtas

Ipinakita ng Diyos sa ilang propeta na ang Tagapagligtas ay mag-aalay ng Kanyang buhay bilang handog para sa ating mga kasalanan. Lahat ng hayop na inihandog sa Diyos bago dumating si Jesus ay mga paglalarawan ng

gagawin niyang paghandog. Ang makasalan ay nagdadala ng kordero o kambing sa saserdote upang patayin at sunugin sa dambana. Ang ibig sabihin nito'y: "Diyos, ako'y nagkasala laban sa iyo. Ikinalulungkot ko at hindi ko



DATING HANDOG

na gagawin yaon. Alam kong kamatayan ang parusa sa kasalanan, kaya dapat akong mamatay. Nguni't mangyaring tanggapin mo ang handog na ito bilang kapalit ko at patawarin mo ako. At ako'y mamumuhay na para sa iyo."

Mahusay na inilalarawan ng ika-53 kabanata ng Isaias kung paano gagawing handog para sa ating kasalanan ang Tagapagligtas, nguni't muli siyang mabubuhay at magagalak na makita ang mga taong naligtas dahil sa



BAGONG HANDOG

Kanyang kamatayan. Si Jesus ay naging handog para sa ating kasalanan at ating Tagapagligtas. Sinabi ng mga propeta kung kailan, saan at paano siya ipagkakanulo ng isang matalik na kaibigan, pagbibintangan, darakpin, lilitisin, pagtatawanan, hahampasin, at ipapako sa krus. Subali't muli siyang mabubuhay. Lahat ng ito'y nangyari kay Jesus, gaya ng sinabi ng mga propeta sa

Matandang Tipan. Pag-aaralan mo pa ang tungkol dito.

Ang Gagawin Mo

12. Anong uri ng handog ang inialay ni Jesus para maligtas tayo sa ating kasalanan?

.... a) Mga kordero at mga kambing.

.... b) Ang mabubuti niyang ginawa.

.... k) Ang kanyang buhay na namatay para sa atin.

Propeta, Saserdote, at Hari

Ipinakita ng mga hula sa Matandang Tipan na ang Mesias ay papahiran ng langis ng Espiritu ng Diyos upang maging Propeta, Saserdote, at Hari natin. Bilang Propeta, Siya ang magiging tinig ng Diyos sa atin. Bilang saserdote, Siya ang ating tinig sa Diyos. Bilang Hari, Siya ang kamay ng Diyos na tutulong at aakay sa atin. Aayusin Niya ang pamantayan na ating pamumuhayan at itatag ang paghahari ng Diyos sa ating mga buhay.

Nang simulan ni Jesus ang Kanyang paglingkod sa madla, binasa Niya sa mga tao ang hulang ito tungkol sa Mesias at ipinabatid sa kanila na nakikita na nila sa Kanya ang katuparan nito:

Isaias 61:1-2. Ang Espiritu ng Panginoong Diyos ay sumasaakin; sapagka't pinahiran ako ng Panginoon upang ipangaral ang mabubuting balita sa mga maamo; kanyang sinugo ako upang magpagaling ng mga bagbag na puso, upang magtanyag ng kalayaan sa mga bihag, at magbukas ng bilanguan sa mga nabibilanggo; upang magtanyag ng kalugud-lugod na taon ng Panginoon.

Propeta .Si Moises ay dakilang propeta, lider na relihiyoso, at pinuno ng mga taong Judio may 1,400 taon bago sumilang si Jesus..Sa pamamagitan niya'y kinausap ng Diyos ang mga tao. Tinanggap niya ang kautusan ng Diyos at ibinigay sa bayan.

Inilabas niya sila mula sa pagkaalipin. Mga dakilang himala ang naganap sa kanyang ministryo at nagpatunay na sinugo siya ng Diyos upang manguna ng kanyang bayan. Sinabi ni Moises:

Deuteronomio 18:15. Palilitawin sa iyo ng Panginoon mong Diyos ang isang propeta sa gitna mo, sa iyong mga kapatid, na gaya ko.

Si Jesus ay katulad ni Moises sa maraming bagay. Nangusap sa pamamagitan Niya ang Diyos. Gumawa Siya ng mga dakilang himala. Pinalaya Niya ang mga tao sa pagkaalipin ng kasalanan. Bilang propeta, maraming pangyayari ang hinulaan ni Jesus, kabilang na rito ang Kanyang pagkapako sa krus, ang Kanyang pagkabuhay na muli pagkaraan ng tatlong araw, ang Kanyang pagbabalik sa langit, ang gagawin ng Kanyang mga alagad, ang pagdating ng Esipiritu Santo, ang paglaganap ng ebanghelyo, at ang pagkawasak ng templo sa Jerusalem. Lahat ng ito'y nangyayari gaya ng sinabi ni Jesus. Ilan sa mga hula Niya ang natutupad na ngayon. At alam nating magkakatotoo ang natitira pang hula.

Saserdote. Sinulat ng Salmista tungkol sa Mesias:

Awit 110:4. Sumumpa ang Panginoon at hindi magsisisi, ikaw ay saserdote magpakailanman ayon sa pagkasaserdote ni Melchisedech.

Idinalangin ng mga saserdote sa Matandang Tipan ang bayan at naghandog din ng hain para sa kanilang mga kasalanan. Idinalangin ni Jesus ang Kanyang mga tagasunod noong narito Siya sa lupa at idinadalangin tayo ngayon. Ang handog Niya para sa ating mga kasalanan ay ang Kanyang buhay.



Ngayon, makalalapit tayo sa Diyos para patawarin sa pamamagitan ni Jesus na ating Saserdote. Sa tuwing dadalangin tayo sa Kanya, inilalapit ng ating Saserdote ang ating mga pangangailangan sa Diyos.

Hari. Isang Haring mananakop ang Mesias, ayon sa mga hula sa Matandang Tipan. Tatalunin Niya si Satanas, ang kaaway ng Diyos at ng sangkatauhan. Sasakupin Niya ang kasalanan, karamdaman, kalungkutan, at pati kamatayan. Tatalunin Niya ang hukbo ng kasamaan at itatatag ang isang paghaharing may sakdal na katarungan at kapayapaan sa lupa. Lulutasin Niya ang suliranin sa buong daigdig. Kaya, di kataka-takang ang mga tao ay naghihintay sa kanyang pagdating. Ang hulang binasa mo sa Isaias 9:6 ay tungkol sa Pangulo ng Kapayapaan ay ganito pa ang wika:



Isaias 9:7. Ang paglago ng kanyang pamamahala at ng kapayapaan ay hindi magwawakas, sa lukiukan ni David, at sa kanyang kaharian, upang itatag, at upang alalayan ng kahatulan at katuwiran mula ngayon hanggang sa magpakailanman.

Mapapansin mong tinatawag na *Anak ni David* si Jesus sa mga ebanghelyo. Ayon sa kautusan, Siya ang may karapatang tagapagmana ng trono ni David. Nakilala ng kanyang mga tagasunod na ang mga himala Niya't ginawa'y pawang katangian ng kahanga-hangang paghahari ng Mesias. Ibig Siyang gawing hari ng mga tao noon. Subali't hindi pa handa si Jesus na magtatag ng Kanyang kahariang pandaigdig. Una sa lahat ibinigay Niya sa atin ang mga pamantayan at kondisyon upang pagharian Niya ang ating mga puso at mga buhay. Ngayo'y panahon ng pag-aanyaya sa mga tao na tanggapin si Jesus bilang Hari. Pinalalaya Niya yaong tumatanggap sa Kanya bilang Hari at iniaalis sa kapangyarihan ng kasalanan at ni Satanas.

Balang araw, paririto sa lupa si Jesus upang itatag ang Kanyang kaharian. Kaya, mahalagang matutuhan mo kung sino si Jesus, paano Siya maghahari, at ano ang magiging bahagi mo sa Kanyang Kaharian. Maaaring iyong ipinalangin ito.

Panalangin:

Jesus, mangyaring tulongan mo akong matuto ng katotohanan tungkol sa iyo. Tulongan mo akong maipagkaloob sa Iyo ang dakong nararapat sa Iyo sa aking buhay. Mangyari nawa.



Ang Gagawin Mo

13. Gaano katagal magiging saserdote ang Tagapaglitás?
-
14. Sino ang propetang makakatulad ng Tagapaglitás?
-
15. Kapag dumalangin tayo kay Jesus at humingi ng kapatawaran ng ating mga kasalanan dahil sa Kanyang handog, Siya'y kinikilala natin bilang
- a) isang Propetang tulad ni Moises.
 - b) ating Saserdote.
 - k) Mananakop at Hari.
16. Ang tawag na *Anak ni David* ay tumutukoy sa Mesias bilang
- a) Propeta
 - b) Saserdote
 - k) Hari
17. *Isipin Mo.* Bakit mahalagang matutuhan mo ang lahat ng makakaya mo tungkol kay Jesus?

Markahan ang iyong mga sagot.

Aralin 2 - Mga Sagot

Ang mga tanong ay nangangailangan ng 21 impormasyon. Napakahusay ang antas ng nakakuha ng 19 hanggang 21 tamang sagot; 15 hanggang 18, mabuti; mula 11 hanggang 14, katamtaman. Kung wala pang 11 ang tamang sagot, basahing muli ang aralin.

1. k) kapahayagang ibinigay ng Diyos sa pamamagitan ng Kanyang mga propeta.
3. k) Si Jesus na Pinahiran ng Langis, ang Mesias.
4. Propeta, saserdote, at hari.
5. a) Unti-unti sa pamamagitan ng mga propeta sa loob ng 4,000 taon.
6. k) 330.
8. b) mahalaga bilang larawan ng hula tungkol sa Mesias at sa Kanyang gawain.
9. Mga Hebreo.
10. a) Binhi ng isang babae - Genesis 3:15.
 b) Makapangyarihang Diyos - Isaias 9:6.
 k) Ipinanganak sa Bethlehem - Mikas 5:2.
 d) Emmanuel - Isaias 7:14.
 e) Pangulo Kapayapaan - Isaias 9:6.
 g) Isinilang ng isang dalaga - Isaias 7:14.
11. k) Tao't Diyos.
12. k) Ang Kanyang buhay, na namatay para sa atin.
13. Magpakaylanman.
14. Si Moises.
15. b) Ating Saserdote.
16. k) Hari.

Bilang ng mga tamang sagot Antas